

a ratou mohiotanga kaore rawa tatou i te kauawhiwhi atu. Tena i timata mai to tatou totohu i nawhea? Kua mutu ta tatou kai-tangata, ta tatou whaiwhaia, te noho kiri tahanga. Kua huhua rawatu a tatou kai-kauhou, o tatou kai-hautu i tena ahuatanga i tena ahuatanga. Kua whawha katoa te wahine ki nga mahi a te tane. Kua roia etahi, kua karaka etahi, kua takuta etahi, kua ununiho etahi, kua 'mekanika' etahi, kua kairuuri etahi, kua tiati etahi, kua kairehita etahi, kua Atoone-Tinanara tetahi, a kua Pirimia-Awhina rawa hoki.

Kei heatu ano, heoi te mea kia mau, kia u. Kia kaha ake hoki a muri ki te tawhai kia tangotango ngatahi kei te haere tonu i ia tau ki nga whakamatautauranga whakauru ki nga 'Uniwahiti.'

He aha atu ano e koingotia na?

Heoi te mea e tika ana kia whawhatia e tatou ko te tikanga whakakotahi i te hapai o te reo, o te hoe, me te patu. Ka taea noatia atu, engari kei hea ranei te ki me te raka hei huakanga atu i te kuwaha.

Metemea nei kua kotahi rawa te whakaaro o 'Te Whetereihana' penei na kei a ratou rawa te huarahi tika, e tika ana hoki kia whakakotahi i raro i ta ratou whakahaere.

Kei te ki tena haahi kei a ia te tika, a, ko Te Momona rawa e tino korero ana i tera waahi. Kei te pera ano Te Katorika, te haahi matua.

I tenei wa kei te wawata tena haahi tena haahi kia uru he mema mona ki Te Paremata, hei whakahaere i ana tikanga e tautoko ana.

He whakaaro tika tenei, a he mea pai hoki kia hangaia he ture whaka mana kia uru he mema hei reo mo tena haahi mo tena haahi, kia hangaia ranei te ture kia whakakotahitia he haahi, ina te he he wehewehe no tatou i runga i te pakanga ki to tatou whakapono. Ki taaku mahara mehemea hoki kaore te kupu 'Me nga Anahera Pono' i whakaurua mai ki roto i te whakapono Ratana kua mama rawa te whakakotahi, notemea ko etahi atu whakahaere o taua Whetereihana kei te ahua pai noaiho, e hapai ana hoki i te Mana Rangatira, i Te Mana Maori. Otira ko ratou ma, ko nga mea i tata tonu me Te Atua, i wehewehe ai, a ko tatou kia kore!

Kei te tika ranei kia penei tatou, ara kia noho atu, kia noho mai, whetero atu, whetero mai? Kaore e tika kia wahangutia te whakahahe, te whaka tikatika, ka whakapapaku ki raro rawa, otira ko te tika ko te pono hei rakau ki taku mahara ma tenei tu ahua e kitea ai nga tino kaupapa pai, kaupapa pono mo nga tikanga arahi i Te Iwi Maori ki Te Pono.

He mea tika hoki tetahi ahua o te whakakotahi ki te whakawhaiti i nga marae o te iwi hei korero i nga take hei hoatu ki te aroaro o te Paremata hei tirotiri mai. I runga i